



ՀԱՅԱՍՏԱՆԻ ՀԱՆՐԱՊԵՏՈՒԹՅՈՒՆ
ՎՃՌԱԲԵԿ ԴԱՏԱՐԱՆԻ ՔՐԵԱԿԱՆ ՊԱԼԱՏ

Ո Ր Ո Շ ՈՒ Մ

ՎԱՐՈՒՅԹԻ ԸՆԴԴԱՏՈՒԹՅԱՆ ՀԱՐՑԸ ԼՈՒԾԵԼՈՒ ՄԱՍԻՆ

30 դեկտեմբերի 2024 թվական

ք.Երևան

Հայաստանի Հանրապետության Վճռաբեկ դատարանի քրեական պալատը,

նախագահությամբ՝
մասնակցությամբ դատավորներ՝

Հ.ԱՍԱՏՐՅԱՆԻ
Ս.ԱՎԵՏԻՍՅԱՆԻ
Հ.ԳՐԻԳՈՐՅԱՆԻ
Լ.ԹԱԴԵՎՈՍՅԱՆԻ

ուսումնասիրելով թիվ ԱՐԴ/0434/01/24 քրեական վարույթի տարածքային ընդդատության հարցը լուծելու համար Վճռաբեկ դատարանի քրեական պալատի նախագահին ուղարկելու մասին Երևան քաղաքի առաջին ատյանի ընդհանուր իրավասության քրեական դատարանի՝ 2024 թվականի դեկտեմբերի 23-ի որոշումը,

Պ Ա Ր Զ Ե Ց

Վարույթի դատավարական նախապատմությունը.

1. 2024 թվականի մայիսի 24-ին Արմավիրի մարզի առաջին ատյանի ընդհանուր իրավասության դատարանում ստացվել է Նժդեհ Հովհաննեսի Ենոքյանի վերաբերյալ՝ 2003 թվականի ապրիլի 18-ին ընդունված ՀՀ քրեական օրենսգրքի (այսուհետ՝ նաև ՀՀ քրեական օրենսգիրք) 223.1-րդ հոդվածի 1-ին մասով և 223.2-րդ հոդվածի 2-րդ մասի 1-ին և 5-րդ կետերով թիվ 48102424 (ԱՐԴ/0434/01/24) քրեական վարույթը:

Արմավիրի մարզի առաջին ատյանի ընդհանուր իրավասության դատարանը 2024 թվականի մայիսի 30-ին որոշում է կայացրել թիվ ԱՐԴ/0434/01/24 քրեական վարույթն ստանձնելու և նախնական դատալսումներ նշանակելու մասին:

2024 թվականի հոկտեմբերի 4-ին թիվ ԱՐԴ/0434/01/24 քրեական վարույթը վերաբաշխվել է դատավոր Հ.Մելիսյանին:

Արմավիրի մարզի առաջին ատյանի ընդհանուր իրավասության դատարանը 2024 թվականի հոկտեմբերի 9-ին որոշում է կայացրել թիվ ԱՐԴ/0434/01/24 քրեական վարույթն ստանձնելու և նախնական դատալսումներ նշանակելու մասին:

2. Արմավիրի մարզի առաջին ատյանի ընդհանուր իրավասության դատարանը 2024 թվականի դեկտեմբերի 12-ին՝ նախնական դատալսումների ընթացքում, որոշում է կայացրել քրեական վարույթն ըստ տարածքային ընդդատության Երևան քաղաքի առաջին ատյանի ընդհանուր իրավասության քրեական դատարան փոխանցելու մասին:

3. Երևան քաղաքի առաջին ատյանի ընդհանուր իրավասության քրեական դատարանը 2024 թվականի դեկտեմբերի 23-ին որոշում է կայացրել թիվ ԱՐԴ/0434/01/24 քրեական վարույթը Վճռաբեկ դատարանի քրեական պալատի նախագահին ուղարկելու մասին՝ ընդդատության հարցը լուծելու համար:

4. Քրեական վարույթը Վճռաբեկ դատարանում ստացվել է 2024 թվականի դեկտեմբերի 26-ին:

Ընդդատության վերաբերյալ հարցը լուծելու համար էական նշանակություն ունեցող փաստական հանգամանքները.

5. Նժդեհ Հովհաննեսի Ենոքյանի նկատմամբ ՀՀ քրեական օրենսգրքի 223.1-րդ հոդվածի 1-ին մասով և 223.2-րդ հոդվածի 2-րդ մասի 1-ին և 5-րդ կետերով հանրային քրեական հետապնդում է հարուցվել այն բանի համար, որ նա «(...) [Մ]տուցել և 2022 թվականի մայիս ամսվա դրությամբ պահպանել է քրեական աստիճանակարգության բարձրագույն՝ «քրեական հեղինակության» կարգավիճակ, այն է՝ քրեական ենթամշակույթ կրող խմբավորման սահմանած և ճանաչված վարքագծի կանոնների համաձայն՝ համարվում է հեղինակություն, սրբեղծել և ղեկավարել է քրեական ենթամշակույթ կրող խմբավորում, որի հետապնդած

նպատակների իրականացման համար փվել է հրահանգներ, ինչպես նաև կատարել է քրեական ենթամշակույթ կրող խմբավորման հետապնդած նպատակների իրականացմանն ուղղված այլ գործողություններ:

Այսպես.

Նժդեհ Հովհաննեսի Ենոքյանը, «գողական աշխարհում» հայրնի լինելով որպես 2003 թվականից անհետ կորած համարվող «օրենքով գող Գոռիկի» ազգականը, սրացել ու 2022 թվականի մայիս ամսվա դրությամբ պահպանել է քրեական աստիճանակարգության բարձրագույն՝ «քրեական հեղինակության» կարգավիճակ՝ հայրնի դառնալով «Նժդիկ» մականվամբ: Նժդեհ Ենոքյանի հիշյալ կարգավիճակը ճանաչված է եղել ինչպես «քրեական աշխարհի» ներկայացուցիչների, այդ թվում՝ «օրենքով գողի» կարգավիճակ ունեցող անձանց, այնպես էլ Նժդեհ Ենոքյանի կողմից սրեղծված և ղեկավարվող քրեական ենթամշակույթ կրող խմբավորման մասնակիցների կողմից: Վերջիններից մեկը՝ Նժդեհ Ենոքյանի կողմից սրեղծված և ղեկավարվող քրեական ենթամշակույթ կրող հանցավոր խմբավորման մասնակից Արթուր Եգոռի Մարտիրոսյանը, որը նշված խմբավորման մեջ հայրնի է «Կիլդիմ» մականվամբ, Նժդեհ Ենոքյանի հետ խոսակցությունների ընթացքում նրան դիմել է վերջինիս կարգավիճակն ընդգծող «քերոր» արտահայտությամբ, ինչպես նաև բազմիցս նշել, որ նրա խոսքերից առավել «ճիշտ» իր համար գոյություն չունի՝ պարտավորվելով անվերապահորեն կատարել նրա՝ գողոնը վերադարձնելու, կատարած գողությունների և այլ հանցագործությունների արդյունքում ձեռք բերված «եկամուրից» նրան «բաժին» հանելու բոլոր պահանջները: Վերջինս պարբերաբար նշել է, որ Նժդեհ Ենոքյանն իրենց «գողն է», «քերորն է», «լիդերն է»՝ այդպես ընդգծելով վերջինիս կարգավիճակը: Նժդեհ Ենոքյանին նույն կերպ են դիմել նաև հիշյալ խմբավորման մյուս անդամները:

(...)

Բացի այդ, «Նժդիկ» մականվամբ հայրնի, «հանցավոր հեղինակություն»՝ քրեական աստիճանակարգության բարձրագույն կարգավիճակ ունեցող Նժդեհ Հովհաննեսի Ենոքյանը, որը 18.04.2003թ. ՀՀ քրեական օրենսգրքի 104-րդ հոդվածի 1-ին մասով և 131-րդ հոդվածի 2-րդ մասի 1-ին կետով նախատեսված հանցանքների

կապարման համար 2014 թվականի սեպտեմբերի 22-ին դատապարտվել է 9 տարի 6 ամիս ժամկետով ազատազրկման և պարիժ է կրել ՀՀ ԱՆ փարբեր քրեակադրոնոլական հիմնարկներում, պարիժ կրելու ընթացքում, այսինքն՝ հանդիսանալով քրեակադրոնոլական հիմնարկում պահվող անձ, Արմավիրի մարզում սրեղծել և ղեկավարել է քրեական ենթամշակույթ կրող խմբավորում՝ քրեական աստիճանակարգությամբ ու միջանձնային հերարխիկ հարաբերություններով օժտված անձանց միավորում, որը գործում է իր սահմանած և ճանաչած վարքագծի կանոնների համաձայն, որոնք չեն համապարասխանում պետության սահմանած վարքագծի համապարտադիր կանոններին և դրանց իրացման իրավաչափ ձևերին, հովանավորել է խմբավորման անդամների կողմից կապարված հանցագործությունները, իրականացրել է մասնավոր հարցերին առնչվող վեճերը (խնդիրները) լուծելը, անօրինական օգուր կամ այլ առավելություն ստանալը, որի հերասպնդած նպարակների իրականացման համար տվել է հրահանգներ, ինչպես նաև տնօրինել է քրեական ենթամշակույթ կրող խմբավորման միջոցով սրացված անօրինական օգուրը և կապարել է քրեական ենթամշակույթ կրող խմբավորման հերասպնդած նպարակների իրականացմանն ուղղված այլ գործողություններ: Մասնավորապես, Նժդեհ Ենոքյանը սրեղծել է «քրեական աշխարհում» ընդունված և ճանաչված վարքագծի կանոնների համաձայն գործող քրեական ենթամշակույթ կրող խմբավորում, որում ընդգրկված են եղել Արմավիրի մարզի Սարդարապար գյուղի բնակիչներ, «Գոնչ» մականվամբ էդգար Հովհաննեսի Ենոքյանը, «Ապեր» մականվամբ Էվրիկա Յոլակի Ենոքյանը, «Կիլիմ» մականվամբ Արթուր Եգորի Մարտիրոսյանը, «Ծո» մականվամբ Արմեն Մարտունիկի Լուսիկյանը և քննությամբ չպարզված այլ անձինք, ովքեր ստանալով և կապարելով քրեական ենթամշակույթ կրող խմբավորման կողմից հերասպնդվող նպարակների իրականացմանն ուղղված գործողություններ կապարելու մասին Նժդեհ Ենոքյանի հանձնարարությունները, մասնակցել են քրեական ենթամշակույթ կրող խմբավորմանը, ինչպես նաև ներգրավվել դրա հերասպնդած նպարակների իրականացմանը:

2022 թվականի մայիսի 24-ին Արթուր Մարտիրոսյանը ինքնությունը դեռևս չպարզված ոմն Ռաֆոյի հեր միասին ապօրինի մուրք են գործել Արմավիրի մարզի

Սարդարապատ համայնքում գրավող, Հմայակ Ռաֆիկի Արգարյանին պարկանող գեղեցկության սրահ և այնպեղից գողացել են «Էլոս» մագահեռացման և այլ սարքեր՝ Հմայակ Արգարյանին պարճատելով շուրջ 10.000 ԱՄՆ դոլարին համարժեք գույքային վնաս: Գողացված ապրանքները վերադարձնելու խնդրանքով Հմայակ Արգարյանը դիմել է Նժդեհ Ենոքյանին, որն էլ Արմավիրի մարզի Սարդարապատ գյուղի բնակիչներ Արմեն Մարտունիկի Լուսիկյանի և իր եղբայր Էդգար Հովհաննեսի Ենոքյանի միջոցով Արթուր Մարտիրոսյանից պահանջել է վերադարձնել գողացված ապրանքները: Արթուր Մարտիրոսյանը, մայրնանշելով խմբավորման մեջ սահմանված կանոնները, մասնավորապես՝ գողոնը վերադարձնելու դեպքում որպես «փոխհատուցում» դրա վաճառքի հնարավոր գնի չափով գումար սրանալու ակնկալիքը, փորձել է Արմեն Լուսիկյանի հետ բանակցել իրեն փոխհատուցվող գումարի չափի մասին, քանի որ համաձայն չի եղել առաջարկվող 160,000 ՀՀ դրամի հետ, որի վերաբերյալ իր դժգոհությունն է արտահայտել խմբավորման փարեր անդամների մոտ, սակայն Նժդեհ Ենոքյանը Արթուր Մարտիրոսյանի հետ քողարկված հեռախոսային խոսակցության ընթացքում նախապելով վերջինիս այն բանի համար, որ իրեն «ստիպում է» նույն հարցի կապակցությամբ ասվածը կրկնել, հրահանգել է անմիջապես վերադարձնել գողոնը: Արթուր Մարտիրոսյանը, որևէ կերպ չկարողանալով ընդդիմանալ Նժդեհ Ենոքյանի պահանջին և հայտարարելով, որ նրա խոսքերից առավել «ճիշտ» իր համար գոյություն չունի, վերադարձրել է գողացված ապրանքները՝ ընդունելով առաջարկվող 160.000 ՀՀ դրամը: (...):»¹:

6. Արմավիրի մարզի առաջին ատյանի ընդհանուր իրավասության դատարանը 2024 թվականի դեկտեմբերի 12-ի որոշմամբ արձանագրել է հետևյալը. «(...) Համաձայն «ԷԿԵՆԳ» ՓԲԸ փոխգործելիության հարթակի միջոցով սրացված Նժդեհ Հովհաննեսի Ենոքյանի վերաբերյալ անձնական փվյալների՝ 2021 թվականի հունիսի 03-ից վերջինս գրավել է ՀՀ արդարադատության նախարարության (այսուհետը՝ ԱՆ) «Երևան-Կենտրոն» ԲԿ հիմնարկում (...):

(...)

Քրեական գործերի նյութերի ուսումնասիրությունից պարզ է դառնում, որ Նժդեհ Հովհաննեսի Ենոքյանին մեղսագրվել է ՀՀ նախկին քրեական օրենսգրքի 223.1-րդ

¹ Տե՛ս վարույթի նյութեր, հատոր 2, թերթեր 119-121:

հողվածի 1-ին մասով (համապատասխանում է ՀՀ գործող քրեական օրենսգրքի 322-րդ հոդվածի 1-ին մասին) և ՀՀ նախկին քրեական օրենսգրքի 223.2-րդ հոդվածի 2-րդ մասի 1-ին և 5-րդ կետերով (համապատասխանում է ՀՀ գործող քրեական օրենսգրքի 323-րդ հոդվածի 2-րդ մասի 1-ին և 5-րդ կետերին) նախատեսված ենթադրյալ հանցանքների կատարում: Ներկայացված մեղադրանքների ուսումնասիրությունից երևում է, որ Նժդեհ Ենոքյանը իրեն մեղսագրվող ենթադրյալ արարքները կատարելու ժամանակ գտնվել է ՀՀ ԱՆ «Երևան-Կենտրոն» ՔԿ հիմնարկում (ք.Երևան, Նալբանդյան 104): Այսինքն՝ ենթադրյալ հանցանքները Նժդեհ Ենոքյանի կողմից կատարվել են Երևան քաղաքի առաջին արյանի ընդհանուր իրավասության քրեական դատարանի դատական տարածքում:

(...)

Ամփոփելով վերոգրյալը՝ Դատարանը գտնում է, որ անհրաժեշտ է թիվ ԱՐԴ/0434/01/24 քրեական գործն ըստ ընդդատության փոխանցել Երևան քաղաքի առաջին արյանի ընդհանուր իրավասության քրեական դատարան: (...):»²:

7. Երևան քաղաքի առաջին ատյանի ընդհանուր իրավասության քրեական դատարանը 2024 թվականի դեկտեմբերի 26-ի որոշմամբ արձանագրել է հետևյալը. «(...) Դատարանը, վերոգրյալ իրավական և փաստական փյուռների վերլուծության հիման վրա իր անհամաձայնությունն է հայտնում Արմավիրի մարզի առաջին արյանի ընդհանուր իրավասության դատարանի 2024 թվականի դեկտեմբերի 12-ի որոշմամբ արտահայտված այն դիրքորոշման հետ, որ «(...) [Ն]երկայացված մեղադրանքների ուսումնասիրությունից երևում է, որ Նժդեհ Ենոքյանը իրեն մեղսագրվող ենթադրյալ արարքները կատարելու ժամանակ գտնվել է ՀՀ ԱՆ «Երևան-Կենտրոն» ՔԿ հիմնարկում (ք.Երևան, Նալբանդյան 104): Այսինքն՝ ենթադրյալ հանցանքները Նժդեհ Ենոքյանի կողմից կատարվել են Երևան քաղաքի առաջին արյանի ընդհանուր իրավասության քրեական դատարանի դատական տարածքում(...)»: Մասնավորապես, Նժդեհ Ենոքյանին առաջադրված մեղադրանքի ուսումնասիրությունը հնարավորություն չի տալիս պարզել մեղսագրվող հանցանքների կատարման վայրը: Միևնույն ժամանակ հարկ է արձանագրել, որ Նժդեհ Ենոքյանի նկատմամբ հարուցված հանրային քրեական հետապնդման

² Տե՛ս վարույթի նյութեր, հատոր 5, թերթեր 82-88:

համաձայն՝ նա «(...) 2014 թվականի սեպտեմբերի 22-ին դատապարտվել է 9 տարի 6 ամիս ժամկետով ազատազրկման և ՀՀ ԱԵ տարբեր քրեակարարողական հիմնարկներում պատիժ կրելու ընթացքում, այսինքն՝ հանդիսանալով քրեակարարողական հիմնարկում պահվող անձ, Արմավիրի մարզում սրտեղծել և ղեկավարել է քրեական ենթամշակույթ կրող խմբավորում (...)»:

Վերոգրյալի հիման վրա Դատարանը գտնում է, որ Արմավիրի մարզի առաջին ատյանի ընդհանուր իրավասության դատարանի դատավոր Հ.Մեխակյանը նախնական դատախոսուհիների փուլում մեղադրյալին մեղսագրված փաստական հանգամանքների շրջանակից դուրս որոշակի հանգամանք է հաստատված համարել և գործն ուղարկել է Երևան քաղաքի առաջին ատյանի ընդհանուր իրավասության քրեական դատարան, մինչդեռ դատարանը նախնական դատախոսուհիների փուլում սահմանափակված է եղել մեղադրյալ Ն.Ենոքյանի նկատմամբ հարուցված քրեական հետապնդում հարուցելու որոշմամբ արտացոլված փաստական հանգամանքներով:

Վերոգրյալի հիման վրա՝ Դատարանը գտնում է, որ մեղադրանքի փաստակազմի ուսումնասիրությամբ հնարավոր չէ պարզել մեղադրյալ Ն.Ենոքյանին մեղսագրված հանցանքների կատարման վայրը, ուստի այս դեպքում պետք է գործի մինչդատական վարույթն իրականացրած նախաքննության մարմնի նստավայրի չափանիշը:

Վերոգրյալի հիման վրա Դատարանը գտնում է, որ թիվ ԱՐԴ/0434/01/24 քրեական վարույթը պետք է ուղարկել Վճռաբեկ դատարանի քրեական պալատի նախագահին՝ վարույթի տարածքային ընդդատության հարցը վերջնականապես լուծելու համար: (...)»³:

Վճռաբեկ դատարանի քրեական պալատի հիմնավորումները և եզրահանգումը.

8. Սույն վարույթով բարձրացված իրավական հարցը հետևյալն է. հիմնավոր է արդյո՞ք Արմավիրի մարզի առաջին ատյանի ընդհանուր իրավասության դատարանի հետևությունն այն մասին, որ թիվ ԱՐԴ/0434/01/24 քրեական վարույթն ընդդատյա է

³ Տե՛ս վարույթի նյութեր, հատոր 5, թերթեր 97-105:

Երևան քաղաքի առաջին ատյանի ընդհանուր իրավասության քրեական դատարանին:

9. ՀՀ Սահմանադրության 63-րդ հոդվածի 1-ին մասի համաձայն՝ *«Յուրաքանչյուր ոք ունի անկախ և անաչառ դատարանի կողմից իր գործի արդարացի, հրապարակային և ողջամիտ ժամկետում քննության իրավունք»:*

10. «Մարդու իրավունքների և հիմնարար ազատությունների պաշտպանության մասին» եվրոպական կոնվենցիայի 6-րդ հոդվածի 1-ին մասի համաձայն՝ *«Յուրաքանչյուր ոք, (...) նրան ներկայացված ցանկացած քրեական մեղադրանքի առնչությամբ, ունի օրենքի հիման վրա սրեղծված անկախ ու անաչառ դատարանի կողմից ողջամիտ ժամկետում արդարացի և հրապարակային դատաքննության իրավունք»:*

10.1. Մարդու իրավունքների եվրոպական դատարանը, *«օրենքի հիման վրա սրեղծված դատարան»* հասկացությունը մեկնաբանելիս նշել է. *«Այն երկրներում, որտեղ օրենքը կողիֆիկացված է, դատական համակարգի կազմակերպումը չի կարող թողնվել դատական մարմինների հայեցողությանը, սակայն դա չի նշանակում, որ դատարաններն օժտված չեն համապատասխան ազգային օրենսդրությունը մեկնաբանելու որոշակի ազատությամբ»⁴:*

Միննույն ժամանակ, դատական մատչելիության իրավունքի համատեքստում Մարդու իրավունքների եվրոպական դատարանը նշել է, որ *«Ներպետական դատական արյանները դատավարական կանոնները կիրառելիս պետք է ձեռնպահ մնան դրանց չափազանցված ձևականացումից, որն իր ազդեցությունը կունենա դատավարության արդարացիության վրա»⁵:*

11. Վճռաբեկ դատարանը *Գևորգ Հարությունյանի* գործով իրավական դիրքորոշում է ձևավորել այն մասին, որ *«(...) Գործերի պարշաճ ընդդատությունը, որպես արդար դատաքննության անհրաժեշտ բաղկացուցիչ, հիմնարար իրավական արժեք է: Դրա հիմնարար բնույթը բխում է արդար դատաքննության ինստիտուցիոնալ փարրից՝ անկախ, անկողմնակալ, իրավասու և օրենքի հիման վրա*

⁴ Տե՛ս Մարդու իրավունքների եվրոպական դատարանի՝ *Gorgiladze v. Georgia* գործով 2009 թվականի հոկտեմբերի 20-ի վճիռը, գանգատ թիվ 4313/03, 69-րդ կետ:

⁵ Տե՛ս Մարդու իրավունքների եվրոպական դատարանի՝ *Walchli v. France* գործով 2007 թվականի հուլիսի 26-ի վճիռը, գանգատ թիվ 35787/03, 29-րդ կետ:

արեղծված դարարան ապահովելու պետության պոզիտիվ պարտականությունից: Իսկ այդ պարտականությունն իր հերթին, ըստ էության, ամրագրված է Հայաստանի Հանրապետության իրավական համակարգում բարձրագույն իրավաբանական ուժ ունեցող այնպիսի նորմատիվ ակտերում, ինչպիսիք են ՀՀ Սահմանադրությունը (...), Քաղաքացիական և քաղաքական իրավունքների մասին միջազգային դաշնագիրը (14-րդ հոդված) և «Մարդու իրավունքների և հիմնարար ազատությունների պաշտպանության մասին» եվրոպական կոնվենցիան (6-րդ հոդված): (...)

Պատշաճ ընդդատության հիմնարար իրավական նշանակությունն այն է, որ յուրաքանչյուր կոնկրետ քրեական գործը քննող դարարանի որոշման հստակ կանոնների առկայությունը և դրանց կանխարեւելի գործադրումն անհրաժեշտ պայման են կողմնակի դիրորդի մոտ այնպիսի համոզմունք ձևավորելու համար, որ տվյալ կոնկրետ քրեական գործը քննող դարարանը և դատավորը նախարարամատրվածություն չունեն, և տվյալ գործը վարույթ ընդունելիս սուբյեկտիվիզմն ու կամայակայությունը բացառված են եղել:

Այսպիսով, քրեական գործերի ընդդատության որոշման հստակ, կամայականությունը բացառող կանոնների առկայությունը և գործադրումը պարտադիր նախապայման են արդարադատության մատչելիության պատշաճ երաշխավորման համար (...)⁶:

12. Վերոգրյալից հետևում է, որ ընդդատության կանոններն այն չափանիշներն են, որոնց հիման վրա որոշվում է, թե տվյալ գործով որ դատարանը պետք է իրականացնի արդարադատություն: Այդ չափանիշների հիմքում ընկած է ոչ թե իրավակիրառների սուբյեկտիվ հայեցողությունը, այլ քրեական վարույթի օրենքով սահմանված օբյեկտիվ հատկանիշները, որոնց առկայությունն էլ թույլ է տալիս արձանագրել տվյալ դատարանի՝ այդպիսին հանդես գալու իրավունքն այդ վարույթով: Միաժամանակ, ընդդատության կանոնները կոչված են անձին գերծ պահելու դատական շրջապատույտից, որը կարող է առաջանալ, եթե դատարանները հրաժարվեն գործը վարույթ ընդունել իրենց ընդդատյա չլինելու պատճառարանությամբ:

⁶ Տե՛ս Վճռաբեկ դատարանի՝ Գևորգ Հարությունյանի գործով 2011 թվականի հուլիսի 13-ի թիվ ԵԿԴ/0211/01/10 որոշումը, կետեր 15-16:

Ընդդատության ինստիտուտը հիմնարար նշանակություն ունեցող արժեք է, քանի որ այն անմիջականորեն կապված է անձի՝ օրենքի հիման վրա ստեղծված դատարանի կողմից իր գործի քննության իրավունքի հետ: Քրեական վարույթի մասնակիցների համար պետք է կանխատեսելի լինի, թե իրենց գործով որ դատարանը պետք է իրականացնի արդարադատություն:

13. ՀՀ քրեական դատավարության օրենսգրքի 261-րդ հոդվածի համաձայն՝
«1. Առաջին արյանի ընդհանուր իրավասության դատարանին ընդդարյա են այն վարույթները, որոնք վերաբերում են այդ դատարանի դատական փարածքում ենթադրաբար կատարված հանցանքներին՝ անկախ քննչական ենթակայության կանոններից:

2. Եթե վարույթը վերաբերում է առաջին արյանի ընդհանուր իրավասության փարբեր դատարանների դատական փարածքներում ենթադրաբար կատարված երկու կամ ավելի հանցանքներին, ապա մեղադրանքը քննում է այն դատարանը, որի դատական փարածքում ենթադրաբար կատարվել է վերջին հանցանքը:

3. Եթե մինչդատական վարույթի ընթացքում հնարավոր չի եղել պարզել սույն հոդվածի 1-ին և 2-րդ մասերով նախատեսված՝ ենթադրյալ հանցանքների կատարման վայրը, ապա մեղադրանքը քննում է այն դատարանը, որի դատական փարածքում է գտնվում մինչդատական վարույթն իրականացրած նախաքննության մարմնի նստավայրը: (...):»:

Նույն օրենսգրքի 263-րդ հոդվածի համաձայն՝ *«1. Նախնական դատալսումների ընթացքում պարզելով, որ փվյալ վարույթն ընդդարյա չէ իրեն, դատարանն այն որոշմամբ անհապաղ փոխանցում է ըստ ընդդարության:*

(...)

4. Վարույթն ըստ փարածքային ընդդարության սրացած առաջին արյանի ընդհանուր իրավասության դատարանը մինչև նախնական դատալսումներ նշանակելը ետօրյա ժամկետում որոշում է կայացնում վարույթը Վճուրբել դատարանի քրեական պալար ուղարկելու մասին, եթե համաձայն չէ վարույթի փարածքային ընդդարությանը:

(...)

7. Սույն հոդվածի 4-րդ մասով նախատեսված դեպքում Վճռաբեկ դատարանի քրեական պալատը վարույթը Վճռաբեկ դատարանում սրանսայու պահից հնգօրյա ժամկետում վերջնականապես լուծում է վարույթի տարածքային ընդդատության հարցը: (...)»:

ՀՀ քրեական օրենսգրքի 223.1-րդ հոդվածի 1-ին մասի համաձայն՝ «1. Քրեական աստիճանակարգության բարձրագույն կարգավիճակ տալը կամ սրանսայր կամ պահպանելը (...)»:

Նույն օրենսգրքի 223.2-րդ հոդվածի համաձայն՝ «1. Քրեական ենթամշակույթ կրող խմբավորում սրեղծելը կամ ղեկավարելը՝ սույն օրենսգրքի 222-րդ կամ 223-րդ հոդվածով նախատեսված հանցագործության հարկանիշների բացակայության դեպքում (...)»:

2. Սույն հոդվածի առաջին մասով նախատեսված արարքը, որը կատարվել է՝

1) քրեակատարողական հիմնարկում պահվող անձի կողմից,

(...)

5) քրեական աստիճանակարգության բարձրագույն կարգավիճակ ունեցող անձի կողմից (...)»:

14. Սույն վարույթի նյութերի ուսումնասիրությունից երևում է, որ՝

- Արմավիրի մարզի առաջին ատյանի ընդհանուր իրավասության դատարանը, արձանագրելով, որ համաձայն «ԷԿԵՆԳ» ՓԲԸ փոխգործելիության հարթակի միջոցով ստացված Ն.Ենոքյանի վերաբերյալ անձնական տվյալների՝ վերջինս իրեն վերագրվող ենթադրյալ հանցանքները կատարելու ժամանակ գտնվել է ՀՀ արդարադատության նախարարության «Երևան-Կենտրոն» քրեակատարողական հիմնարկում, որոշում է կայացրել քրեական վարույթն ըստ ընդդատության Երևան քաղաքի առաջին ատյանի ընդհանուր իրավասության քրեական դատարան փոխանցելու մասին⁷:

- Երևան քաղաքի առաջին ատյանի ընդհանուր իրավասության քրեական դատարանը, գտնելով, որ վարույթի տարածքային ընդդատության հարցը որոշելիս դատարանը սահմանափակված է քրեական հետապնդում հարուցելու որոշմամբ նշված փաստական հանգամանքներով, իսկ սույն դեպքում առաջադրված

⁷ Տե՛ս սույն որոշման 6-րդ կետը:

մեղադրանքի ուսումնասիրությունը հնարավորություն չի տալիս պարզել վերագրվող հանցանքների կատարման վայրը, փաստել է, որ մեղադրանքը պետք է քննի այն դատարանը, որի դատական տարածքում գտնվում է մինչդատական վարույթն իրականացրած նախաքննության մարմնի նստավայրը:

Միննույն ժամանակ Երևան քաղաքի առաջին ատյանի ընդհանուր իրավասության քրեական դատարանն արձանագրել է, որ Ն.Ենոքյանի նկատմամբ հարուցված հանրային քրեական հետապնդման համաձայն՝ վերջինս տարբեր քրեակատարողական հիմնարկներում պատիժ կրելու ընթացքում, Արմավիրի մարզում է ստեղծել և ղեկավարել քրեական ենթամշակույթ կրող խմբավորում⁸:

15. Նախորդ կետում վկայակոչված փաստական հանգամանքները գնահատելով սույն որոշմամբ մեջբերված իրավադրույթների և իրավական դիրքորոշումների լույսի ներքո՝ հարկ է արձանագրել, որ Ն.Ենոքյանին ներկայացված մեղադրանքի բովանդակությունից հետևում է, որ վերջինիս ՀՀ քրեական օրենսգրքի 223.1-րդ հոդվածի 1-ին մասով և 223.2-րդ հոդվածի 2-րդ մասի 1-ին և 5-րդ կետերով վերագրվող ենթադրյալ հանցանքի կատարման վայրը մինչդատական վարույթի ընթացքում չի պարզվել, հետևաբար, սույն վարույթի տարածքային ընդդատությունը որոշելիս պետք է հիմք ընդունել ՀՀ քրեական դատավարության օրենսգրքի 261-րդ հոդվածի 3-րդ մասի կարգավորումը, համաձայն որի՝ մեղադրանքը պետք է քննի այն դատարանը, որի դատական տարածքում է գտնվում մինչդատական վարույթն իրականացրած նախաքննության մարմնի նստավայրը: Սույն վարույթով մինչդատական վարույթն իրականացվել է ՀՀ քննչական կոմիտեի Արմավիրի մարզային քննչական վարչությունում, որի նստավայրը գտնվում է Արմավիրի մարզում:

16. Ինչ վերաբերում է Արմավիրի մարզի առաջին ատյանի ընդհանուր իրավասության դատարանի կողմից վկայակոչված՝ «ԷԿԵՆԳ» ՓԲԸ փոխգործելիության հարթակի միջոցով ստացված Ն.Ենոքյանի վերաբերյալ անձնական տվյալներին, ապա հարկ է արձանագրել, որ վերոնշյալը **բավարար չէ հիմնավոր հետևության հանգելու, որ Ն.Ենոքյանն իրեն վերագրվող ենթադրյալ**

⁸ Տե՛ս սույն որոշման 7-րդ կետը:

հանցանքները կատարել է Երևան քաղաքի առաջին ատյանի ընդհանուր իրավասության քրեական դատարանի դատական տարածքում:

17. Վերոշարադրյալի հիման վրա, Վճռաբեկ դատարանի քրեական պալատը գտնում է, որ Արմավիրի մարզի առաջին ատյանի ընդհանուր իրավասության դատարանի հետևությունն այն մասին, որ թիվ ԱՐԴ/0434/01/24 քրեական վարույթն ընդդատյա է Երևան քաղաքի առաջին ատյանի ընդհանուր իրավասության քրեական դատարանին, հիմնավոր չէ:

Ամփոփելով՝ Վճռաբեկ դատարանի քրեական պալատը գտնում է, որ թիվ ԱՐԴ/0434/01/24 քրեական վարույթն ընդդատյա է Արմավիրի մարզի առաջին ատյանի ընդհանուր իրավասության դատարանին:

Վերոգրյալի հիման վրա և ղեկավարվելով ՀՀ քրեական դատավարության օրենսգրքի 263-րդ հոդվածի 7-րդ մասով՝ Վճռաբեկ դատարանի քրեական պալատը

Ո Ր Ո Շ Ե Ց

Նժդեհ Հովհաննեսի Ենոքյանի վերաբերյալ՝ 2003 թվականի ապրիլի 18-ին ընդունված ՀՀ քրեական օրենսգրքի 223.1-րդ հոդվածի 1-ին մասով և 223.2-րդ հոդվածի 2-րդ մասի 1-ին և 5-րդ կետերով թիվ ԱՐԴ/0434/01/24 քրեական վարույթն ընդդատյա է Արմավիրի մարզի առաջին ատյանի ընդհանուր իրավասության դատարանին:

Նախագահող՝ _____ Հ.ԱՍԱՏՐՅԱՆ

Դատավորներ՝ _____ Ս.ԱՎԵՏԻՍՅԱՆ

_____ Հ.ԳՐԻԳՈՐՅԱՆ

_____ Լ.ԹԱԴԵՎՈՍՅԱՆ